

Du

Heissisch Lynn oder Hugo?
Hesch gärn Pasta mit Sugo?
Gosch viel i Wald, hesch lieber heiss oder chalt?
Und hesch Geburtstag scho bald?

Isch dini Lieblingsfarb rot?
Hesch gärn Ketchup uf em Brot?
Könnsch en guete Witz?
Chasch springe so schnell wie de Fritz?

Wer bisch du du dulidu, wer bisch du, wer bisch dulidu?
Wer bisch du du dulidu, jo genau, dich mein ich.

Hesch churzi oder längi Hoor?
Isch das, wo verzellsch, immer wohr?
Spilsch gärn mit em iPod Touch,
oder find das dini Muetter au en so ne Quatsch?

Bisch truurig, wenn's nid schneit
oder de Turm scho wieder zämegheit?
Hesch lieber Chatze oder Hünd?
Isch de Teddy no immer din Frönd?

Wer bisch du du dulidu, wer bisch du, wer bisch dulidu?
Wer bisch du du dulidu, jo genau, dich mein ich.

Suechsch öppe mol dini Finke?
Tüend d'Socke mängisch stinke?
Tuesch gärn us de Fläsche trinke
und de Frau Meier übere winke?

Hesch s Mul schön zue bim Ässe?
Tuesch s'Zahnputze nie vergässe?
Weisch, was dich wirklich glücklich macht,
und worum üse Lehrer eso sälte lacht?

Wer bisch du du dulidu, wer bisch du, wer bisch dulidu?
Wer bisch du du dulidu, jo genau dich mein ich.

Jo dich.